

Ence chest an l'é stat n bon "Gust de la Lum"!

Se à serà sù con sodesfazion de duc la terza edizion del projet che viventea l'istà di joegn te Fascia
con scomenzadive de legreza e ensegnament.



Fenesc con sodesfazion, da man de chi che à endrezà e de chi che à tout part, la terza

edizion del projet de animazion da d'istà per i joegn de le mesane e di prumes egn de le scole aute de Fascia.

Seron sù per la terza outa nosc Gust de Lum, ence chest an con n bilanz segur deldut positif amò en crescer respet a chi passé. Ai béleche 40 joegn partezipanc da duta Fascia scric ite per l'istà 2012 ge aon proponet n muon de scomenzadive che à portà legrezza, divertiment e speron ence valch ensegnement.

L'idea de la sociazion Fassalux l'era chela de realisar n percors de scontrade e atività che podesse ge dar l met ai joegn de madurar valch pensier su la marevea del corp e de dute soe potenzialità; sun coche sie na machina che va polito, ma che cogn esser rencurada e vardada via, percheche la posse semper star ben. Emben te le sie setemane dai 23 de messal ai 31 de aost, l'é stat portà dant dî per dî n program che à tout ite man a man aspec che revardaa part desferente de l'organism uman, dal ciaf ai piè. Ti prumes dis dediché a l'ureia, aon fat anter l'auter Body percussion, bal Schuhplattler, flashmob, na scontrada con na persona sorda; dintornvìa l'eie aon descoret e proà coche podessa esser na vita senza veder, sion jic a sbarar ja Pardac tel nef poligon (n zenter deldut nef, segur da proar per i pascioné) e a osservar da sera le steile e l'univers senza fin col canocial fora San Valentin - Gummer.

Fora per la terza setemana aon rejonà de cher e de cervel: aon podù sezionar e studiar l daïte da n vedel co l'aiut de la dotora Jenny Deluca, che la ne à didà a entener miec le funzion di òrghegn e far jir l cervel te nosce Olimpiadi del pensier, fate de domane de cultura e de jeghes de logica.

Rejonar de cher con joegn no l'é semper sorì, ma no l'é nia de più enteressant che far doi ciacole sui prumes amores e de proar a se dar valch consei su co i viver fosc a na vida miora e più bela.

L'é stat i dis averc di polmogn e de la respirazion, chi più sfadiouisc di muscoi, chi più encolorii de la pel: aon podù, de gra a l'intervent de n muie persone che ne à didà, viver de bele giornade no demò passan l temp, ma vardan de emparar e crescer. No l'é mencià le grignade, i sgherc, le gran smoades te l'aga freida, le gite stroz per l Trentin e sa mont te anter la neif e l crep, i pré e i bosc. Aon nodà, coret, tegnù l fià, pedalà, mateà, cojinà, lavà jù, ensema.

Sion stac ence trei dis vin Badia te n camping, per cognoscer miec che che l'é da l'autra man del Sela e capir che no sion i soi a aer la fortuna de viver te posc da encant e che en ùltima anter Ladins se rua a se entener dalvers enceben che se rejone no deldut l medemo idiom.

Rué junsom al terzo "Gust de la Lum" ben segur cognon ge dir n gran detalpai a duc chi che ne à didà e sostegnù: jent, sociazion e firme. N ringraziament soraldut a duc i Comuns de Fascia che per l terzo an i ne à dat l met de proponer n projet che no podessa jir inant senza finanziaemenc publiches.

Amò n gran detalpai ai cater animatores, che se à dat jù con gaissa e pascion percheche l Gust de chest istà l podesse esser dalbon ensaorì coscì coche l'é stat: al veteran Thomas, al general Matteo, a la doucia Vanessa e a la prezisa Simonetta. L più gran detalpai a le familie, che ge à dat fiduzia al projet e che ne à emprestà si fies per tante giornade de bel star adum.

Scomenza endò la scola e rua l'uton, ma ti momenc mingol snigolé e freic podaron ge pissar ai bie dis passé ensema e segur recordan l "gnignignigni", le not de bozole passade te tenda, i viajes te coriera, l jech dai pugnes e i tenc amisc cognosciui, podaron semper se far na bela

grignada, de chele de Gust!

[Usc di Ladins 07.09.12.pdf](#)

{comments on}